

Dithero tsa Tirelano mo Kutlwanong

Thero ka moletlo wa go gopola botsalo jwa Morena, e le ka 25. 12. 2011 05/2012

Mo leineng la modimo o e leng rara le morwa le mowa o o boitshepo!

1. Sefela sa 51 - 51/58
2. **Thapelo:** Morena Modimo Rara yo o mo legodimong, yo o nang le lorato lo lo gakgamatsang, re a go leboga, re a go galaletsa, Morena wa legodimo le lefatshe, gonne o re senoletse lorato lwa gago ka go re fa Morelefedu, e bong Jesu Keresete Morwao. Re kopanye fano gore re utlwe Lefoko la gago. Ka moo re a kopa gore o re fe Mowa wa gago, o re gogele mo go wena, re nne bana ba gago ba ba rategang, re tshele botshelo jo bo amogelesegang mo go wena. Re di kopa ka ene Jesu Keresete, Morena wa rona. Amen.
3. Epistolo ka fa thulaganyong ya 2 e kwadilwe mo go Tito 3:4-7;
4. Efangele ka fa thulaganyong ya 1 e kwadilwe mo go Luka 2:1-20.
5. A go ipolelwe tumelo ya bokriste!
6. Sefela sa 52 - 52/60
7. Thapelo ya mmadi wa thero.
8. Epistolo ka fa thulaganyong ya 4 e kwadilwe mo go 1 Johane 3:1-6, e re: "Bonang, ke lorato lo lo ntseng jang ne, lo Modimo Rara o re ratileng ka lone gore re bidiwe bana ba Modimo! Mme tota re bone. Ke ka moo lefatshe le sa re itseng, ka gonne ga le a ka la itse ene. Baratwi, jaanong re bana ba Modimo, mme ga go ise go bonatshege gore re tla nna jang. Mme re itse gore fa a sena go bonatshega, re tla tshwana nae; gonne re tla mmona jaaka a ntse. Mongwe le mongwe yo o nang le tsholofelo eo mo go ene o a itshekisa jaaka ene a itshekile. Mongwe le mongwe yo o dirang boleo o a siamolola; boleo ke jona tshiamololo. Mme lo itse gore ene o bonetse gore a tlose boleo, mme mo go ene ga go na boleo. Mongwe le mongwe yo o ntseng mo go ene ga a leofe; mongwe le mongwe yo o leofang ga a ise a mmone, le fa e le go mo itse." Amen.

Thero: Phuthego e e rategang ya Morena wa rona Jesu Keresete, kajeno re dira moletlo wa botsalo jwa Morena wa rona Jesu Keresete. Ka moo re itumela thata, gonne kajeno Modimo o re senolela lorato lwa ona ka go re busetsa mo kemong e e feleletseng ya go nna bana ba ona ka Jesu Keresete Morena wa rona yo o tlogetseng setulo sa kgalalelo mo legodimong, a fologa, a amogela botho, a tshwana le batho mo kemong ya gagwe, a fitlha boModimo jwa gagwe fa pele ga matlho a batho. Kwa ntle ga moo o ne a itshenolela mo go bone, fa e le Modimo ruri. Bangwe ba ne ba fiwa go bona kgalalelo ya gagwe ya boModimo. Kajeno re itumetse thata, gonne re

gopola gore ka letsatsi leo Moitshepi wa Modimo a tla mo lefatsheng, Jesu a tsalwa kwa Bethlehemema kwa Jutea, a tsalelwa gore e nne Mopholosi wa merafe yotlhe ya lefatshe lotlhe. Ka moo le rona ba re seng ba morafe wa Bajuta ka fa tlhagong re itumetse, gonne le rona re buseditswe ka Jesu Keresete mo kemong ya go nna bana ba Modimo. Ke sona se re se rutiwang mo Epistolong ya kajeno, fa go twe: **Re bidiwa bana ba Modimo! Tota re bone.** Ka moo

1. Re tshela ka go ikanya Morena.
2. Re tshela ka go itshwarelwa dibe.
3. Re tshela ka go nna mo go Keresete.

Phuthego e e rategang ya ga Keresete, moapostolo Johane re mo utlwa kajeno a bua, a re: Le fa re setse re le bana ba Modimo tota ka Jesu Keresete yo o tlleng, yo re mo tsaletsweng gore a re busetse mo kemong ya go nna bana ba Modimo tota; le fa go ntse jalo jaaka re sa ntse re le bana ba Modimo ba ba tshelang mo lefatsheng, ga go ise go bonatshege gore re tla nna jang, gonne ka go nna ngwana wa Modimo ga re fetoge mo mmeleng wa rona. Modumedi o sa ntse a tshela mo mmeleng wa nama. Ka moo yo e leng yo montsho o tla nna a na le mmele wa yo montsho. Fela jalo yo mosweu, fa a dumela, ka a sa ntse a tshela mo lefatsheng, o tla nna le mmele wa yo mosweu, a tla nna a bua puo ya sa ga gabo. Ke gona moapostolo a buang, a re: Ga go ise go bonatshege gore re tla nna jang. Mme re itse gore fa a sena go bonatshega, re tla tshwana nae. Ke gona re buang, re re: Re bana ba Modimo ka tsholofelo, re tshela ka go solofela, ka go ikanya, ka go dumela, e seng ka go bona. Kana tsholofelo ka go ikanya se motho a sa se boneng ka matlho. Ka moo re re: **Bana ba Modimo ba tshela ka go ikanya Morena.** Ka moo botlhe ba ba batlang ponatshego ba latlhegelwa ke kemo ya go nna ngwana wa Modimo, jaaka re bona mo mohuming yo o mo moleteng wa molelo, a kopa Aborahame gore a romele Lasaro gore a rerele bomorwa rraagwe ba ba neng ba sa ntse ba le mo lefatsheng, mme Aborahame a mo raya, a re: Fa ba sa utlwe Moše le baporofeti, ga ba ka ke ba kgonega, le fa mongwe a ka tsoga mo baswing. Re tshela ka go solofela, e seng ka go bona. E bile Jesu o ne a kaela Thomase, a re: Go sego ba ba dumetseng, le fa ba sa bone. Thomase o ne a sa dumele, fa barutwa ba bangwe ba mmoleletse gore Jesu o tsogile, mme ene o ne a re: Ga a ka ke a dumela, fa a sa mmone ka matlho, fa a sa mo ame ka diatla. Go sego yo o dumelang, le fa a sa bone. Ga go tlhokege ponatshego, le e seng sepe se sele se se ka tshikinyang mo go rona gore re tlhomame mo kitsong ya gore re bana ba Modimo. Kana re bone tota ka go tshela mo tsholofelong. Re boleletswe jalo.

Moapostolo Johane o tswelela ka go bua gore mongwe le mongwe yo o nang le tsholofelo eo mo go ene, o a iitshekisa. Ka moo re re: **Bana botlhe ba Modimo ba tshela ka go itshwarelwa**

dibe. Boitshwarelo jwa dibe ke se segolo tota. Ga go na ngwana wa Modimo, fa e se ka boitshwarelo jwa dibe mo leineng la ga Jesu. Atame le Efa ba ise ba wele mo boleong ba ne ba le mo kemong e e feleletseng ya go nna bana ba Modimo, mme e rile ba sena go wela mo boleong ba latlhegetswe ke bongwana, bolele bo ba kgaoganya le Modiri wa bone, bo ba fofatsa gore ba se tlhole ba mmona, ba sa mo rate, mme ba tlhoe yo e leng Modiri yo o boitshepo wa bone. Ka Modimo e le yo o boitshepo, Moitshepi tota, batho ba sena go kgotlegela ka bolele, ba ne ba sa tlhole ba atamela mo go ona, ba tswalelwa kwa ntle. Fela jalo batho botlhe ba ba tlhagileng ka fa tlhagong ya botho, bolele bo ba tswaletse kwa ntle, go se na ope yo o nonofileng go tlosa bolele gore a boele mo kemong ya go nna ngwana wa Modimo ka thata ya gagwe. Ka moo setho sotlhe se ne se le ka fa tlase ga bogale jwa Modimo. Mme ka ntlha ya bopelotlhomogi jwa ona jo bo gakgamatsang, Modimo o re rometse Morwaaona Jesu Keresete gore e nne Mopholosi wa batho botlhe. Ke gona re dirang kajeno moletlo wa botsalo jwa ga Jesu Keresete ka boitumelo jo bogolo, gonne ga go na pholoso mo go ope o sele; le gona ga go na leina lepe le sele fa tlase ga legodimo, le le neilweng batho, le re tshwanetseng go pholosiwa ka lone. Kana Keresete o bonatshegile gore a tlose maleo, ene a se na bolele, mme a dirwa bolele mo boemong jwa rona gore ka ene re dirwe bana ba Modimo tota. Tsotlhe tseo di tswa mo Modimong o o dirileng gore re ruane le ona, ga o tlhole wa re balela maleo a rona, mme o beile mo go rona Lefoko la boitshwarelo. Ka moo re re: Bana ba Modimo ba tshela ka go itshwarelwa dibe.

Moapostolo Johane o tswela ka go bua gore mongwe le mongwe yo o ntseng mo go ene ga a lefe. Re itse gore ngwana yo re mo tsaletsweng, e bong Jesu Keresete ke Moitshepi wa Modimo, ke Modimo tota. A ikemisetsa go pholosa batho. Ka moo o tlogetse legodimo, a fologa, a tla mo lefatsheng, a tsalwa ke Maria go nna motho, a nna fa gare ga batho, a fetsa tiro ya go pholosa batho. Yo o neng a sa itse bolele, Modimo o mo dirile bolele ka ntlha ya rona gore re nne basiami fa pele ga ona ka ene. Ka moo re re: Yo e leng **ngwana wa Modimo o tshela ka go nna mo go Keresete** gore fa Modimo o mo leba, o se bone bolele jwa gagwe, mme mo boemong jwa jona, o bone tshiamo ya ga Keresete, o bone tshiamo e e leng Keresete, gonne maleo a motho yo o ntseng mo go Keresete a phimolwa ka tshiamo ya ga Keresete. Jaanong go ka tlhaga potso e e reng: Jaaka re gopola botsalo jwa ga Keresete jo bo dirafetseng kgale pele ga dinyaga tse di makgolo Keresete a setse a boetse mo legodimong, re ka nna jang mo go ene? Jesu a re: Fa lo nna mo Lefokong la me, lo bo lo le barutwa ba me ruri. A re: Yo o jang nama ya me, a nwa madi a me, o ntse mo go nna, le nna mo go ene. A re: Itseng, nna ke na le lona ka malatsi otlhe go ya bokhutlong jwa lefatshe.

Ka moo bana ba Modimo ba ntse mo go Keresete ka go tshela, ka go gogwa ka Lefoko la Morena, ka go amogela disakaramente. A o rata le wena gore o nne ngwana wa Modimo tota? A

o ko o tle mo go Keresete, o nne mo go ene. Le ene o tla nna mo go wena ka bosakhutleng. Amen.

Thapelo: Morena, Modimo, Rara wa kutlwelo-botlhoko, re a leboga, ka o rometse Morwao yo o rategang mo lefatsheng go nna motho, go nna Mopholosi le Molefedi wa batho. Morena, Jesu Keresete, re a baka, gonne wa tlogela kgalalelo ya legodimo gore o nne mohumanegi ka ntlha ya rona, o re humise ka khumanego ya gago, wa tla go nna nkgonne gore rona re nne bana ba Modimo mmogo le wena. Morena, o tle mo go rona o re gopotse ka botsalo jwa gago jwa kwa Bethlehem, o re fe dipelo tsa bongwana, re dumele mo go wena, re itumelele go tla ga gago mo lefatsheng ka dipelo tse di lebogelang ruri. Wena o lesedi la legodimo, o re sedimosetse mo lefifing la lefatshe leno. Wena botshelo jo bo sa khutleng, o re fe botshelo gore re tshele mmogo le wena! Wena Morena wa kagiso, o re fe kagiso ya gago mo dinakong tsena tsa dipheretlhego, tsa dipitlagano, tsa dipolaelano. Wena yo o leng kgalalelo ya bogosi jwa Modimo, o re ntšhafatse rotlhe gore re tshwane le wena mo boitshepong jwa gago! O re bolokele mo pusong ya gago gore re go direle, re go galaletse mo bogosing jwa gago ka metlha, le mangole otlhe a khubame le rona fa pele ga gago, Ngwana wa Modimo, yo o leng Kgosi ya dikgosi, le Morena wa barena. Amen.

9. Thapelo ya Morena: Rara wa rona yo o mo legodimong ...

10. Sefela sa 58 - 58/68

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke I. Dube † (†), ka ngwaga wa 1983/1994/2006

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.